

14 Juli 1566.

*Missive du Prince d'Orange à Son Altèze, en date le  
14 de Juillet 1566.*

MADAME,

Je suis hier au soir arrivé en ceste ville à sept heures seulement, à cause que, pour aucuns mes affaires, partiz tard de Bruxelles. Arrivant près de Berchem, demie-lieue d'icy, me vint trouver Monsieur de Brederode, avecq bon nombre des Gentilzhommes, lesquelz, après m'avoir donné une salve de leurs pistoletz, aucuns bourgeois estans en la troupe, cryoient : « *Vive les Geux!* », ce qu'en chemin jusques en la ville se continua par fois, et, à mon samblant, trouvis, tant hors que dedans la ville, plus de trente mil hommes. Ceulx de la ville vindrent vers moy, ausquelz déclairant le grand désir que Vostre Altèze avoit les conserver, me donnarent quelques articles ou ordonnances, pour donner ordre en ceste ville, lesquelz aujourd'huy examinerons plus près, pour en faire le mieulx ; ils dient que aujourd'huy doibvent continuer leurs presches hors la ville avecq grand nombre de gens, et aucuns d'iceulx en armes pour les garder, à cause qu'ilz ont entendu le Drossart de Brabant avoir commission les rompre. Incontinent que fuz arrivé, j'ai faict parler aux principaulx, pour les faire désister, mais crains qu'ilz ne le délaissent partant ; espérant néanmoins qu'ilz ne prescheront en la ville. De ce qu'en sera advenu et adviendra, en advertiray à Vostre Altèze, à laquelle je prie Dieu, après avoir baisé très-humblement ses mains, la conserver en santé, longue vie.

D'Anvers, le XIII<sup>e</sup> jour de Juillet 1566.

Collationnée à l'auctenticque copie, est trouvée  
accorder par moy,

A. GRAPHEUS. (1)

(1) Aangehaald blz. 120. Zie ook GACHARD, *Correspondance de Guillaume le Taciturne, Prince d'Orange* T. II, p. 136.